

Ata'karitéshera kentióhkwa

# Itohetston aesaiéntá:'on ne COVID-19 Ienonhkwa'tsherata'áhstha Karón:ware

2.0 watón:tha tsi káhsón Enniskkó:wa 29 niieskahá:wis, 2021

## Nahò:ten akaterhá:rate ne nón:wa iawenhniseratenióntie

- Thikén:'a í:ken tsi ionttó:ka's tsi niiakoià:tawen's tsi ní:ioht ne ionhkará:rens, onekwénhtara niwahsóhkawen's, io'tónkwen tsi nón:we iesawe'éhston, tesahwihshenhé:ion, sanonhwaranòn:waks, sawase'tanòn:waks, sewistóskwas, iononhwákte tsi teiohstien'terónnion, táhnon ehtà:ke tsi sen'tonhkwarhos.
- Sénha ióhteront ionttó:ka's tsi niiakoià:tawen's wa'kèn:re né:'e. Sheiatewennáta'ahs ne iakotshináhken tóka'ni teiesáhsnie's tóka'ni tsi iakawenheiontaientáhkwa niaháhse tóka' othé:nen kí:ken nensaià:tawen tsi na'tekiátère ne áhsen niwenhniserá:ke tsi saientá:'on ne ienonhkwa'tsherata'áhstha: sata'keráhkware, io'tónkwen skonhsà:ke tóka'ni tsi thsakà:ronte, sanoròn:se ahsatón:rie, tesatskennè:nonte táhnon kwah í:ken tsi saserénhtara's, è:neken tsi sen'tonhkwarhos (íhsi nón:we ne 40°C), saia'tihshónhkwa tóka'ni sahsiá:rara's, tóka'ni ó:ia sattó:ka's tsi nisaià:tawen's (e.g. "o'nísta nok karón:ware" tóka'ni sahsithénhon).
- Ne AstraZeneca/COVISHIELD ienonhkwa'tsherata'áhstha tekiatátenonhkwe tsi wa'kèn:re ionttó:ka's tsi niiakoià:tawen's né:ne [Vaccine-Induced Prothrombotic Immune Thrombocytopenia \(VIPIT\)](#) ratina'tónhkwa. Tóka' othé:nen ken' naesaià:tawen iotohetston aesaién:ta'ne ne ienonhkwa'tsherata'áhstha ahsathón:tate sheia'tí:sak ne aiesaka'én:ion ne teiesáhsnie's: satonriò:ktha, sentskwe'nanòn:waks, io'tónkwen tóka'ni iowistóskwas senentshà:ke tóka'ni thsinà:ke, taiotkontahkwenhátie tsi sahsiahonhtanòn:waks, kwah í:ken tsi sanonhwaranòn:waks tóka'ni sanoròn:se nahsatkáhtho, tóka'ni nia'té:kon niwà:sa saharennáhtara's, onekwénhtara tóka'ni oharennáhta niotsistohkò:tens tóka'ni tsihnò:kon.

## Shé:kon ken tká:konte akerihwáhsere ne COVID-19 nikaianerenhserò:tens?

- Ienonhkwa'tsherata'áhstha né:'e ne ó:ia ní:ioht tsi enwá:ton ahsatatenónhstate ne tóhsa aesaié:na ne COVID-19. Itohetston tetsiarónhkwen tsi saién:ta's ne COVID-19 ienonhkwa'tsherata'áhstha e'thóhtsi ahsatahsónteren tsi serihwáhsere ne COVID-19

nikaianerenhserò:tens, kwah né:ne satkonhsò:rok, ionaktó:tak tsi na'tesewátere táhnon sewahtsioharéhtsi.

- Se'nikòn:rarak othé:nen naesaià:tawen né:ne COVID-19 tekiatátenon táhnon iesatken'sè:ra tóka' othé:nen sattó:ka's.

### **Kátke e'thóhtsi taontá:ke ne tékeni watòn:tha enwakién:ta'ne?**

- Tékeni ní:kon ienonhkwa'tsherata'áhstha tesatonhwentsió:ni ne káti kwah tokén:'en aesaia'tanonhstá:tonke. Tóka' ken' í:ken ne tiotierénhton tsi saientá:'on ne COVID-19 ienonhkwa'tsherata'áhstha, orihwí:io kénhak tsi tékeni watòn:tha ienonhkwa'tsherata'áhstha ensarihwaién:tase ahskóha tsi ní:ioht tsi iesahró:ri ne tehshakotitsièn:tha tóka'ni kawennárha ao'nikòn:ra. Táshaw sahiatónhsera ón:wa'k iesá:wi ne káti tékeni watòn:tha ensarihwaién:tahse ienséshawe.